

[20:1-7]

וידבר אלהים את כל־הדברים האלה לאמר: אנכי ה' אלהיך אשר הוצאתיך מארץ מצרים מבית עבדים לא יהיה לך אלהים אחרים על־פני לא תעשה־לך פסל | וכל־תמונה אשר בשמים | ממעל ואשר בארץ מתחת ואשר במים | מתחת לארץ לא־תשתחוה להם ולא תעבדם כי אנכי ה' אלהיך אל קנא פקד עון אבת על־בנים על־שלשים ועל־רבעים לשנאי: ועשה חסד לאלפים לאהבי ולשמרי מצותי: לא תשא את־שם־ה' אלהיך לשוא כי לא ינקה ה' את אשר־ישא את־שמו לשוא:

[20:8-14]

זכור את־יום השבת לקדשו ששת ימים תעבד ועשית כל־מלאכתך ויום השביעי שבת | לה' אלהיך לא תעשה כל־מלאכה אתה ובנך ובתך עבדך ואמתך ובהמתך וגרך אשר בשעריך כי ששת־ימים עשה ה' את־השמים ואת־הארץ את־הים ואת־כל־אשר־בם וינח ביום השביעי על־כן ברך ה' את־יום השבת ויקדשהו: כבד את־אביך ואת־אמך למען יארכון ימך על האדמה אשר־ה' אלהיך נתן לך: לא תרצח: לא תנאף: לא תגנב: לא־תענה ברעך עד שקר: לא תחמד בית רעך לא־תחמד אשת רעך ועבדו ואמתו ושורו וחמרו וכל אשר לרעך: